


# Alkitab Buat Bocah Nampilin



Manusia  
Api



Nyeng nulis: Edward Hughes

Nyeng bikin gambar: Lazarus  
Alastair Paterson

Nyeng nyocokin: E. Frischbutter

Nyeng terjemahin: Matheus Nalih Ungin


Dibikin buat: Bible for Children  
[www.M1914.org](http://www.M1914.org)

©2023 Bible for Children, Inc.


Perijinan: Enté boleh ngegandain atau nyetak ini cerita,  
selama enté kagak ngejualnya.



Semuanya kaga ada bagus-bagusnya buat Israel. Sang Raja ama Ratu ngebenci Tuhan. Bener-bener contoh nyeng jelek. Lantas orang-orang juga ngebenci Tuhan dan nyembah illah-illah palsu. Apa masih ada orang nyeng cinta ama Tuhan?



Iya, masing ada orang nyeng nyembah dengan penuh iman. Satu ari Tuhan ngomong sama salah satu orang dari mereka, nyeng namanya Elia.



Elia bilang sama Raja Ahab nyeng jahat, "Demi Tuhan nyeng idup, Allah Israel nyeng aku layanin, sebenarnya kaga bakal ada embun atawa ujan pada taun-taun ini, selaen kalo aku bilang." Ini artinya kelaparan! Tuhan kaga pengen umatNya Israel tetep ada dalem kejahatan.






Abis  
ngingetin  
sang raja,  
Tuhan ngirim  
Elia ke satu

tempat sepi di negri itu. Di sono, di pinggir kali, Elia nungguin. Tuhan ngirim burung gagak buat ngasih makan dia. Mereka ngebawa roti ama daging, pagi ama sore. Dan Elia minum aer kali.



Cepet  
bangat  
kali itu  
jadi kering,  
karena  
kaga ada  
ujan turun  
di negri itu.



Sabda Tuhan bener-bener jadi nyata. Seluruh negri ngalami kekeringan. Jagung kaga tumbuh. Semua orang kelaparan. Kirain Elia itu bakalan terjadi sama dia sekarang sebab aer udah kering.



Tuhan bilang sama Elia. "Udah sigra, pegih ke Sarfat nyeng masih jadi bagian dari Sidon, dan netep di sono. Sekedar tau,



Aku udah nyuruh seorang janda buat ngasih kamu makan."





Tuhan, tau apa nyeng dibutuhin pembantuNya. Tapi ini ialah satu cara nyeng aneh buat ngasih makan. Kaga pake sombong Elia nurutin perintah Tuhan.



Pas dia nyampe di Sarfat, janda itu ada di gerbang kota lagi ngumpulin kayu bakar.



"Coba ambilin aku sedikit aer dalem kendi," Elia minta sama perempuan itu. "Coba ambilin juga buatku sepotong roti bundar." "Sebenarnya kaga ada roti secuil acan-acan buatku," saut janda itu.


"Cuman ada sekepel tepung dalem tempayan ama sedikit minyak

dalem kompan." Rada sedih, perempuan itu bilang sama sang nabi kalo udah abis, dia ama anaknya bakal mati kelaparan.




“Kaga usah takut. Bikin aja dulu buatku sepotong roti bundar kecil, abis itu baru kamu bikin buatmu ama buat anakmu.” “Tepung dalem tempayan itu kaga bakalan abis ama minyak dalam kompan itu juga kaga bakalan kurang sampe wayahnya TUHAN ngasih ujan ke atas bumi.” Tuhan bakal bikin satu keajaiban. Dan Dia ngelakuinnya! Perempuan ama anaknya bisa makan

buat beberapa waktu, tepung dalem tempayan itu kaga abis ama minyak dalem kompan itu kaga kering.




Elia netep sama mereka. Satu ari, ada nyeng bikin sedih. Anak janda itu mati. Elia ngebawa mayat anak laki-laki itu ke atas kamarnya. Dia betereak sama Tuhan, bilangnya, "Ya TUHAN, Allahku aku sembahyang, balikin nyawa anak ini ke dalem badannya." Satu sembahyang nyeng kaga masuk akal.




Tuhan ngedengerin permintaan Elia dan nyawa anak itu balik lagi ke dalem badannya, sampe-sampe ia idup lagi. Pas Elia ngebawa anak itu dan dikasih sama emaknya dia bilang,


"Sekarang aku, kalo Sabda Tuhan nyeng aku ucapin itu bener-bener nyata."



Tiga taun abis itu, Tuhan balik lagi ngirim Elia kepada raja dan bilang, "Aku bakal ngirim lagi ujan ke atas bumi."




Pegih ke Ahab? Bini Ahab Izebel udah matiin seratus nabi Tuhan. Tapi Elia kaga ngebantah sama Tuhan. Dia pegih nemuin Raja Ahab.




Pas waktu dua orang ini ketemuan, Elia nantangin Ahab supaya ngumpulin semua orang Israel dan 850 nabi-nabi palsu.

Di satu tempat nyeng namanya Gunung Karmel, Elia ngomong sama semua orang. "Kalo Tuhan itu Allah, ikutin Dia."





Ellia nyiapin dua ekor sampi laki buat sesembahan. Tapi kaga ada api nyeng bisa dipake buat ngebakarnya. "Lantas biarin kamu mangil-mangil nama allahmu dan aku juga bakal manggil-manggil nama Tuhan." Dia bilang, "Pasti allah nyeng bakal nyaut pake api, dia itu Allah!" "Iyalah kalo begitu," semua rakyat nyaut.



Dari pagi sampe sore nabi-nabi palsu itu manggil-manggil allah palsu mereka, Mereka loncat dan joged ama ngiris-ngiris badannya pake piso sampe pada bedarah. Tapi api kaga juga nongol.





Lantas Elia ngebasahin kayu ama korban sesembahan itu pake aer sampe lepek, dan sembahyang. "Ya, Tuhan, pada ari ini biarin orang pada tau, kalo Engkau itu Allah di tengah-tengah Israel." Lantas api dari Tuhan turun. Ngebakar sampi laki ama kayu. Lantas ngebakar juga meja sesembahan batu itu.



Pas seluruh rakyat ngeliat kejadian itu, mereka tereak, "Tuhan, Dia itu Allah!" Dan Elia bilang, "Tangkepin nabi-nabi Baal itu, kaga boleh dari mereka ada nyeng lolos" Elia ngerjain apa nyeng kudunya dikerjain Raja Ahab betaun-taun sebelumnya.

Dia ngebunuhin nabi-nabi palsu itu.



Lantas pembantu Tuhan  
itu bilang sama Ahab  
kalo ujan bakalan turun.  
Tiba-tiba ada segumpelan awan  
kecil nongol. Apa iya ujan bakalan  
turun? Seudahnya lebih dari tiga  
taun

wayahnya kekeringan  
nyeng luar  
biasa?





Sekelebatan, langit berobah jadi gelap sebab awan item ama angin, dan turunlah ujan gede banget. Tuhan ngirim ujan. Tuhan ngasih unjuk ke semua rakyat kalo apa nyeng dibilang Elia itu bener. Tuhan ngasih tunjuk kalo Dia dewekan itu ialah Tuhan nyeng sebener-benernya.





Apa kamu juga mikir kalo Raja Ahab bakalan ngehormatin Tuhan ama Elia pembantuNya? Kaga! Nyatanya, Izebel nyoba buat ngebunuh Elia, tapi Elia kabur. Akhirnya Ahab mati dalem perang dan pembantu-pembantunya ngedorong Izebel dari tembok istana nyeng tinggi. Dia jatoh nibanin batu dibawahnya dan mati.





Ada kejadian apa sama Elia? Satu ari Tuhan ngirim kreta berapi pake kuda berapi: dan Elia, Manusia api Allah, ngapung ke surga dalem angin topan.





# Manusia Api

Sebuah cerita dari perkataannya Tuhan, Alkitab

Ditemuin di

Kisah 1 Raja-raja 17-19,  
2 Raja-raja 2

"Palang pintu Firman Engkau ngasih terang."  
Mazmur 119:130



Tamat



Ini cerita Alkitab nyeng nyeritain kita soal Tuhan kita nyeng keren, nyeng nyiptain kita ama pengen enté kenal Dia. Tuhan tau kita udah bikin hal-hal nyeng kaga bae, nyeng Dia sebut dosa. Hukuman dosa ya mati, tapi Tuhan sayang banget sama enté, Dia ngirim anaknya nyeng atu-atunya, Yesus, biar mati disalib dan dihukum karna dosa enté semua. Lantas Yesus idup dan balik lagi ke rumahnya ke Sorga. Kalo emang enté yakin ama Yesus dan minta biar Di maafin dosa-dosa enté, Dia bakalan ngelakuinnya! Dia bakalan dateng dan idup di dalem enté ini ari, dan enté bakalan idup ama Dia selamanya.

Kalo enté yakin ini kebenerannya, sautin ini ke Tuhan: Ya Yesus, ané percaya kalo Engkau itu Tuhan, dan berubah jadi manusia buat mati karna dosa ané, dan sekarang Engkau idup lagi. Tulung dateng kedalem idup ané sama maafin dosa-dosa ané, biar ané punya idup nyeng baru ini ari, dan entar bakalan pegih sama Engkau selamanya. Tulungin ané biar bisa nurutin Engkau dan idup buat Engkau ama anak Engkau. Amin.

Bacain Alkitab dan ngomong ke Tuhan tiap ari! Yohanes 3:16

